



mengen, de Moien hat ech de Schnellzuch drop. De Mëtteg loosse ech mer da gutt Zäit.

(Hilarité)

Mir sti jo kuerz virun der Vakanz. Ech hat gehofft, datt ech lech eng schéi Vakanz kéint wënschen. Mä gutt, dat wäert de Gilles Baum dann duerno kënne maachen.

De Projet 7033, deem am August 2016 vum Minister Dan Kersch deposéiert ginn ass, ass u sech elo eppes, wou ech och gär gehat hätt, datt mer dat de leschten Dëschdeg hätte kënnen un dem Max Hahn säi Projet hannendrunhänken. Da wiere mer, mengen ech, séier fäerdeg gewiescht, well et genau déiselwecht Thematik betrëfft. Ech hunn de Max Hahn gefrot: „Gëff mer emol deng Ried, well ech mengen, ech muss knäipen.“

(Hilarité)

Et ass kee Copy-paste drop, mä et ass awer esou, datt, wéi ech als Rapporteur genannt gi sinn - an ech hale mech elo einfach net méi un dat, wat ech hei stoen hunn -, et d'Saach vill méi einfach gemaach huet, fir lech ze soen: Mir haten e Problem als Gemengen, wa mer an déi Aventure eraagange sinn. De Laurent Knauf, mäin Distriktskommissär an der Zäit, huet da bis zu 258 Leit misse mobiliséieren am Land, fir op eng Plaz ze kommen, fir e Vott ze maachen, wou mer eis alleguer eens waren! Ech wëll awer elo kengem e Vott viraushuelen.

An déi Simplification administrative, déi dann elo geschitt, ass u sech, datt mer dat däerfe mat Mathëlef vum Interieur maachen. Den Interieur wäert dat an enger Brëifwahl maachen, déi eis et erlaabt, dat dann eben net méi mussen op der Plaz ze maachen, wou mer dann hibestallt gi sinn, awer iwwer eng Brëifwahl ze maachen, wou nach ëmmer de Gemengerot deen ass, dee bestëmmt, wien en als Kandidat presentéiert a proposéiert. An dat wäert och esou bleiwen. A schlussendlech gëtt de Mandat och esou verlängert, datt en (veuillez lire: datt en net) ophält, bis deen neie genannt ass.

Ech denken, d'Gemengepolitiker, an där si vill heibannen, wäerte Merci soe fir dee Schratt, deen do gemaach ginn ass. An ech mengen, datt dat Gesetz hei eng grouss Zoustëmmung wäert fannen. Déi zwou Säiten, déi ech opgeschriwwen hunn, hunn ech elo an e puer Wieder resuméiert. Dofir nach eng kéier e grouse Merci un lech, Här Minister, awer och un d'Mataarbechter, fir dee Schratt, deen Der elo gemaach hutt, souwuel bei de Loyerskommissionen wéi hei, fir eng Simplification administrative fäerdegzebréngen, déi néideg war.

A fir weider Aweise verweisen ech op dee schréftleche Rapport, dee bäillait. Merci.

► Plusieurs voix.- Très bien!

► **M. Mars Di Bartolomeo, Président.-** Also ech géif dann och allen anere Riedner soen, si sollen hir Rieden op d'Säit leeën an elo just...

(Hilarité)

Den Här Eicher huet dann d'Wuert.

Discussion générale

► **M. Emile Eicher (CSV).**- Genau dat hat ech elo wëlle, Här President. Erlaabt mer awer trotzdem, mengem Kolleg, dem Frank Arndt, e Merci ze soe fir säi konzise schréftleche Rapport a säi ganz perséinleche mëndleche Rapport haut de Mëtteg.

(Hilarité)

Ech mengen, eng Saach, déi sécher ass: Dat hei ass e Projet de loi, deen, ech kann et direkt soen, vun der CSV gedroe gëtt, well et och enger laangjäregger Fuerderung vum Syvicol entsprécht.

(Interruptions et brouhaha)

Et sinn zwou Neierungen an ech kann awer do soen, wat déi Neierung sinn: Dat ass fir d'Éischt dann emol d'Sécherheet - an dat ass, mengen ech, awer ganz wichteg! -, et gëtt Sécherheet geschaaft an där Period tëschent de Gemengewahlen an der Konstitution vum den neie Comitéen a Büren. Do war bis elo ëmmer en zimlechen Tachtelmechtel an dat war ganz schlecht, well besonnesch bei ganz grouse Syndikater hate mer ganz vill Rechtsonsécherheet. An dat gëtt op dësem Wee awer elo ganz kloer gekläert.

► Une voix.- Très bien!

► **M. Emile Eicher (CSV).**- Ech fannen, och wann et nëmmen eng ganz kleng Neierung ass, et ass awer trotzdem eng ganz wichteg.

Dat anert ass eben dat, wat den Här Arndt elo scho gesot huet, datt mer awer wierklech elo

net méi déi Prossessioun vun Honnerte vu Conseillere organiséieren, wéi am Fall vum Syvicol, ausser der Stad Lëtzebuerg, wou mer all Conseiller ugeschriwwen hunn, déi sech an engem Dag hu misse fräihuelen, fir ofstëmmen ze goen. Dat leeft elo vill méi einfach am Sënn och vun der Simplification des procédures. Duerfir ass et elo méi einfach, per Vote par correspondance ofzestëmmen. Villmools Merci fir dat!

Mä ech wollt awer trotzdem vun der Geleeënheet profitéieren, well ech hat gesot: „eng kleng Reform“, et ass awer och eng gréisser Reform vum Minister ugekënnegt ginn. An ech géif och den Här Minister vläicht froen, ob an deem Sënn scho Viraarbechte gelaf sinn, ob en eis vläicht kéint e puer Informatiounen dozou ginn.

Ech soen lech Merci fir d'Nolauschteren a wollt mech awer och dem Här Arndt uschlëssen, well ech hat och gehofft, dee Leschten ze sinn a jiddwerengem eng ganz flott Vakanz, eng erhuelsam Vakanz, och lech, Här President, ze wënschen. Mä bon, voilà, dat ass awer elo net gelongen!

(Brouhaha et hilarité)

► **M. Mars Di Bartolomeo, Président.-** Majo, da Merci och dem Här Eicher.

(Hilarité)

An da gi mer dem Här Hahn d'Wuert weider.

► **M. Max Hahn (DP).**- Och ech wäert da probéieren, dat ouni Ried ze maachen, Här President. Wann dat Äre Wonsch ass,...

(Brouhaha)

...da wäert ech deem natierlech Rechnung droen. An ech géif dann dem Rapporteur, mengem Kolleg, dem Frank Arndt awer hei vun dëser Plaz e ganz grouse Merci soe fir säin dach e bëssen onkonventionellen, awer ganz sympathesche mëndleche Rapport, deen en eis hei virgedroen huet, an natierlech och fir säi schréftleche Rapport. Merci fir déi gutt Zesummenaarbecht an der Kommissioun.

An an deem Sënn géif ech dann och den Accord vun der Demokratescher Partei ginn an...

► M. Claude Lamberty (DP).- Schéi Vakanz!

► **M. Max Hahn (DP).**- ...schéi Vakanz wënschen.

(Hilarité)

► Une voix.- A gudden Appetit!

► **M. Mars Di Bartolomeo, Président.-** Mir sinn nach net esou wäit.

► **Une voix.-** Vill Gléck an der Nationallotterie!

(Hilarité)

► **M. Mars Di Bartolomeo, Président.-** Dann hu mer als Nächsten den Här Roberto Traversini.

► **M. Roberto Traversini (déi gréng).**- Merci. E Rapport, dee schnell a gutt war, an einfach. Ech hunn deen och direkt verstanen. Merci!

A mir ginn natierlech och do den Accord vun eiser Fraktioun.

► **M. Mars Di Bartolomeo, Président.-** Den Här Gibéryen huet d'Wuert.

► **M. Gast Gibéryen (ADR).**- Merci, Här President. Ech ginn och vun eiser Säit aus den Accord zu dësem Projet, a genau wéi den Här Traversini hu mir och de Rapport verstanen.

(Hilarité)

► **M. Mars Di Bartolomeo, Président.-** Merci. Den Här Baum huet d'Wuert.

► **M. Marc Baum (déi Lénk).**- Här President, an deem Fall wëll ech Jubel, Trubel, Heiterkeit och net ënnerbrechen a ginn och den Accord vun der Lénker Fraktioun.

(Hilarité)

► Plusieurs voix.- Aah!

► **M. Mars Di Bartolomeo, Président.-** Merci. An Här Minister, d'Lat ass ganz héich geluecht.

Prise de position du Gouvernement

► **M. Dan Kersch, Ministre de l'Intérieur.-** Ech mengen, dat heiten ass dee beschte Beweis, dass een och mat kleng Schrëtt heiansdo ganz wäit no vir ka kommen. Ech wëllt jiddwerengem e Merci soen, deen hei matgeschafft huet. Effektiv, et ass esou, wéi mer et elo hei scho vun e puer Riedner exposéiert kritt hunn: Et ass eng wesentlech Simplification administrative fir déi Leit, déi an hirer Fräizäit als Gemengepolitiker aktiv sinn, fir deenen d'Liewe wesentlech méi einfach ze maachen.

Op där enger Säit hu mer natierlech d'Simplification vun der Prozedur vun der Nomination, vun der Designation vun den Delegierten, op där anerer Säit, an den Här Eicher

ass dorobber agaangen, e wichtegt Element: d'Prolongation vum Mandat, bis se dann och effektiv remplacéiert sinn, wat déi néideg Rechtssécherheet schaaft. Dann och d'Revocation, déi ersat gëtt duerch de Remplacement, dat heescht, dass de Gemengerot respektiv déi Gemengeréit, déi een Delegierten zesummen designéiert hunn, zu all Moment d'Recht hunn, fir deen Delegierten och erëm zrëckzezéien. Och dat ass e ganz wichtegt Element vun dësem Gesetz.

Duerfir jiddwerengem Merci, deen dorunner matgeschafft huet. An esou, wéi et ausgesäit, schlësse mer eis jo deem un, wat den Här Schmit elo hei realiséiert huet, nämlech Eestëmmekeet. An doriwwer kann ech mech nëmme freeën!

► **M. Mars Di Bartolomeo, Président.-** Merci. Mir géifen dann zum Vott iwwert den Ensembl vum Projet iwwergeen.

Vote sur l'ensemble du projet de loi 7033 et dispense du second vote constitutionnel

D'Ofstëmmung fänkt un. Fir d'Éischt déi perséinlech Stëmmen. Dann d'Procuratiounen. An d'Ofstëmmung ass eriwuer.

Dir hutt et virausesinn, Här Minister: 60 Stëmmen derfir, Unanimitéit.

Ont voté oui: Mmes Diane Aehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz (par M. Claude Wiseler), Serge Wilmes, Claude Wiseler, Michel Wolter et Laurent Zeimet;

MM. Marc Angel, Frank Arndt, Alex Bodry, Mmes Taina Bofferdin, Tess Burton, M. Yves Cruchten, Mme Claudia Dall'Agnol (par M. Roger Negri), MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lamberty, Edy Mertens et Mme Lydie Polfer (par M. Lex Delles);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini;

MM. Gast Gibéryen, Fernand Kartheiser et Roy Reding;

MM. Marc Baum et David Wagner.

Ass d'Chamber bereet, d'Dispens vum zweete Vott unzufroen?

(Assentiment)

Merci. Dann ass dat esou decidéiert.

A mir géifen dann zum nächste Projet vum Ordre du jour iwwergeen. Dat ass de Projet de loi 6593, den Organisationsstatut vum Centre socio-éducatif de l'État. An de Rapporteur, den Här Gilles Baum, ass prett. Här Baum, Dir hutt d'Wuert.

5. 6593 - Projet de loi portant modification

1. de la loi modifiée du 16 juin 2004 portant réorganisation du centre socio-éducatif de l'État;

2. de la loi modifiée du 29 juin 2005 fixant les cadres du personnel des établissements d'enseignement secondaire et secondaire technique;

3. de la loi modifiée du 23 juillet 1952 concernant l'organisation militaire;

4. de l'article 32 du Livre 1^{er} du Code de la sécurité sociale

Rapport de la Commission de l'Éducation nationale, de l'Enfance et de la Jeunesse

► **M. Gilles Baum (DP), rapporteur.-** Villmools Merci, Här President. An ech entschëllege mech, dass ech elo net kann an där gudder Laun, wéi mer elo hei waren, weiderfueren. Mir schwätzen elo iwwer e wierklech ganz seriöses Thema. Mir schwätzen iwwert déi Jugendlech, déi net d'Chance haten, eng gutt Kannerstoff ze hunn, déi Jugendlech, déi keng Hand haten, déi se geleet huet, keng Hand haten, déi se begleet huet, an déi iwwert d'Gericht an eng staatlech Struktur fir Mannerjäregere placéiert ginn.

Eleng schonn d'Nummer vum Rôle, de 6593, léisst drop schlëssen, dass et schonn eng Zäitchen hier ass, wéi dee Projet de loi hei an der Chamber deposéiert ginn ass. Dëst, well mer

eng Abberzuel vun Avisen ageholl hunn, dëst awer och, well de Projet de loi dräimol beim Statsrot war.

Wann et ëm d'Aschränkung vun der Fräiheet geet, da muss ee bis an de leschten Detail derfir suergen, dass gewëssen international Normen a Standarder respektéiert ginn. Wann et dann nach ëm Mineurë geet, da muss een ëmsou méi oppassen.

Mat dësem Text droe mir elo der Jurisprudenz vum Europäesche Geriichtshaff fir Mënscherechter, dem Conseil de l'Europe, dem Europäesche Comité géint Folter an diverse Recommandationen vun der UNO Rechnung. Zil ass et, déi Mannerjäreg ze schützen, déi an eng Struktur vum Stat kommen, sief dat zu Dräibuer oder zu Schraasseg, wou am Moment 92 Jongen a Meedercher betreit ginn.

Dëst Gesetz gëtt de verschiddene Servicer vun den Zentren eng legal Basis an erlaabt eis, d'Unité de sécurité zu Dräibuer, besser bekannt ënnert dem Term UNISEC, elo definitiv opzemaachen, an dat mam Zil, dass keng Mannerjäregere méi sollen op Schraasseg an de Prisong kommen. Et regelt awer och déi intern Organisation an d'Paie vun deene Leit, déi do schaffen.

Och gëtt de Régime disciplinaire festgeluecht no de Regeln, déi international gëlle fir Mannerjäregere, déi vum Stat placéiert ginn. Des Weidere schaaft dëst Gesetz déi legal Basis fir de Projet individualisé, deen den Encadrement vum Mineur soll verbesseren, fir déi informatesch Gestiou vum den Donnéeën, fir d'Kierperduerschichungen, d'Fouillen, déi konform zu internationalem Recht musse sinn, a fir d'Gläichheet vum Salaire vun de Leit, déi an der UNISEC wäerte schaffen, an de Leit, déi am Prisong oder am Centre de rétention schaffen.

D'UNISEC, dat ass eng vun deene siwen Unitéite vum Centre socio-éducatif de l'État. Si iwwerhëlt Aufgaben am sozioeducative Beräich, am schouleschen, am therapeutischen Beräich, awer och am Beräich vun der Prävention. Et ass eng geschlossen Unitéit, déi bis zu zweielef Mannerjäregere ophuele kann, opgrond vu gerichtlechen Uerteeler.

Et ass selbstverständlech, dass an engem Rechtsstat all Mesure, déi d'Fräiheet an d'Rechter aschränkt, muss op enger legaler Basis fousen an déi international Prinzipie muss respektéieren, wat Jugendlecher ugeet, deenen zäitweilleg d'Fräiheet entzu gëtt. De Projet de loi mécht och e ganz kloren Ennerscheed tëschent den educative Mesuren an den disziplinäre Mesuren.

Den Direkter an d'Personal stelle fir all Jugendlechen e Projet individualisé op, deen d'Prise en charge während an awer och no sengem Openthalt an der Struktur festleet, fir de Jugendlechen op seng Entloossung an d'Fräiheet virzubereeden an d'Ziler vun der sozialer Integration an d'Gesellschaft festzeleeën.

De Projet individualisé hëlt Récksiicht op dat psychosoziaalt Ëmfeld vum jonke Mënsch viru senger Zäit an der Struktur, op seng Familijsituatioun, seng Perséinlechkeet, seng Besoinen an Erwaardungen.

Dëse Projet gëtt also am Interêt vum Jonken opgestallt, an Zesummenaarbecht a mat der Zoustëmmung vun de gerichtlechen Instanzen. De Jonke soll un der Ausaarbechtung vu sengem Projet matschaffen. Seng Elteren oder den Tuteur kréien de Projet matgedeelt. Dee Jonken, deen an eng Struktur kënnt, muss gehalten, d'Regele vum Zenter anzehalen, hien ass gehalten, dem Personal ze follegen a mat de Leit zesummenzeschaffen, déi säi Projet individualisé ëmsetzen.

Den Direkter ass de Chef hiérarchique vum Zenter. Him zur Säit steet en Directeur adjoint an déi Responsabel vun deene verschiddenen Unitéiten. Dës assuréieren d'Gestioun vun deene verschiddenen Unitéiten. Si gi vum Direkter fir zwee Joer ernannt an hiert Mandat ka weidergefouert ginn, et kann erneiert ginn.

Fir all Site gëtt e Plan de gestion de crise opgestallt. Fir d'Sécherheet am Zenter sinn natierlech d'Agenten zoustänneg. D'Police suert fir d'Sécherheet dobaussen oder während engem Transfert vun engem Zenter an d'UNISEC. D'Police passt och op déi Jonk op, wa si an d'Klinik mussen, wann eng Garde néideg gëtt, well ee Jonken als geféierlech agestuift gëtt oder wann e Risiko besteet, dass e fortleeft.

Falls d'Gardien en net sollte fäerdegbréngen, fir d'Sécherheet an d'Uerdnung an engem Zenter erëm hierzustellen, ríft den Direkter oder säi Remplaçant d'Police zu Hëllef.

Wat elo d'Disziplin ugeet, do ënnerscheede mer tëschent „mesure disciplinaire“ an „sanction disciplinaire“. D'Mesure disciplinaire huet zum Zil, d'Uerdnung direkt erëm hierzustellen, während Sanktiounen natierlech eng repressiv Wirkung hunn. Nom Prinzip vun der Légalité des peines muss d'Verhalen, wat zu enger Strof



féiert, kloer an engem legalen Text festgeschriwwen sinn. Beim Régime disciplinaire gëtt dem Gesondheitszoustand vum Jugendlechen, senger Maturitéit, senger Verletzlechkeet, awer och den Émstänn an der Gravitéit vun de Fakte Rechnung gedroen.

Während der Prozedur kritt de Jugendlechen e pädagogeschen Encadrement. Hie kann d'Personal, dat hie betreit, gesinn an och d'Hëllef vun engem Affekot ufroen. Kee Jonke kann enger Mesure oder Sanction disciplinaire ënnerleien, ouni am Virfeld iwwert dat Feelverhalen, wat him virgeworf gëtt, informéiert ginn ze sinn an ouni dass hie sech konnt verdeedegen. Virun enger Decisioun gëtt hie vum Direkter oder sengem Verrieder zu de Faite befrot.

Verstéiss, déi zu enger Mesure disciplinaire féieren, kënnen sinn: Ungehorsam, dat heescht de Fait, net ze follegen, all Aktivitéit, déi d'Uerdnung an d'Sécherheet am Zenter gefäerdet, d'Sécherheitsmesurë mëssuechten, d'Futtimaache vu Géigestänn, déi dem Stat oder enger anerer Persoun gehéieren. D'Konsequenzen dovunner, also d'Mesures disciplinaires, sinn eng schréfftlech Aarbecht oder eng onbezuelte Bötz- oder Fléckaarbecht, déi awer net méi laang wéi aacht Stonnen därer daueren.

Am Fall vun engem Verstouss gëtt vum Agent oder dem Educateur e Bericht geschriwwen, wou drasteet, wat geschitt ass, och d'Deposition vum Jonken an eventuell d'Depositione vum Zeien. Den Direkter oder säin Adjoint bewäerten doropshin, ob d'Procédure disciplinaire néideg ass.

D'Decisioun gëtt deem Jonke matgedeelt, dee se kann ufechten. An deem Fall gëtt de Jugendriichter ageschalt, deen d'Entscheidung hält. Géint des Mesurë kann de Jugendlechen e Recours virum Jugendriichter aleeën, géint d'Decisioun vum Jugendriichter gëtt et allerdéngs kee Recours.

Wat déi disziplinär Sanktiounen ugeet, do ass en Openhalt an enger Kummer virgesinn, en Isolement temporaire, deen awer op kee Fall méi laang wéi 72 Stonne kann daueren, an och während deenen 72 Stonne muss de Jugendleche mindestens eng Stonn pro Dag an d'fréisch Loft gelooss ginn.

Eng disziplinär Sanktioun kann nëmmen a schlemme Fäll, déi och dokumentéiert sinn, ausgesprach ginn. Dozou gehéiert: wann e Jugendlechen e puermol fortgelaf ass, sexuell oder physisch Aggressioun, e schlemme Verstouss géint d'Sécherheitsvirschrëften, deen d'Liewe vun anere Jugendlechen, vun de Gardienen oder den Educateuren géif op d'Spill setzen, e widderhuelte Verstouss géint d'Uerdnungsvirschrëften, de Besëtz, d'Consummation, d'Produktion oder de Verkauf vun Drogen, de Besëtz an d'Uwendung vu Waffen a Munitioun, an den Opruff zu enger Emeute.

Bei de Sanktiounen ass d'Prozedur déiselwecht: e Rapport d'évaluation duerch den Direkter an am Fall, wou contestéiert gëtt, en Decisioun vum Jugendriichter. Hei ass e Recours non suspensif beim Jugendriichter méiglech, an dat bis zu siwen Deeg no der Notifikatioun.

Och wann e Jugendleche fir eng Zäitchen agepaart gëtt, därer den Infirmier oder den Dokter zu all Moment bei hie goen.

Wat elo de Volet vun de Fouillen ugeet, also Kierperduerschichungen, do ënnerscheede mer dräi Typen: déi einfach Fouille, dat heescht, déi, wou d'Kleeder ofgetaascht ginn, wou gekuckt gëtt, wat an den Täschen ass, d'Ganzkierperfouille, dat heescht, déi, wou de Jugendleche sech muss ganz oder deelweis ausdoen, an déi intim Fouille, déi awer just duerchgefouert gëtt, wann en akute Risiko fir d'Personal oder aner Jugendlecher kéint bestoen. Dës Fouille kann och nëmmen a Präsenz vun engem Dokter a vun engem Dokter duerchgefouert ginn.

Dës Akte mussen awer am Respekt vun der Mënschewierd duerchgefouert ginn. Déi Ënnersichungen, Duerchsichunge ginn duerchgefouert vun op d'mannst zwee Agenten vum selwechte Geschlecht wéi dee Jonken, dee gekuckt gëtt.

Och déi perséinlech Saache grad ewéi d'Kummer an den Dortoir vum Jugendleche kënnen duerchsicht ginn, an do därer de Jugendlechen derbäi sinn, et sief dann, et géif eng akut Gefor bestoen.

Dëst Gesetz schafft awer och déi legal Basis fir d'Zesummestellen an d'Verwalte vun dräi verschiddene Fichieren: dem individuelle Fichier mat de perséinlechen Donnéeën, engem Fichier vun der UNISEC, deen d'Entréeën an d'Sortien an der UNISEC dokumentéiert, an e Fichier spécial, deen d'Fouillen dokumentéiert.

(Mme Simone Beissel prend la présidence.)

Fir Transparenz suert de Fait, dass och festgehale gëtt, vu wem a wéini a firwat en Dossier

konsultéiert gouf, an des Donnéeën ginn an der Regel no dräi Joer gelöscht.

D'Verwalte vun der UNISEC ass eng richteg Eerausfuorderung fir d'Direktioun a fir all déi Leit, déi do schaffen, well se deeneselwechte Risiken, deeneselwechten Exigenzen, deeneselwechten Ufuorderungen ausgesat si wéi déi Leit, déi am Prisong schaffen. Well d'Aarbeitsbedingungen déiselwecht sinn, awer och fir d'Attraktivitéit vun der Aarbecht ofzesécheren, schafft dëst Gesetz e Parallelismus, wat d'Paien an déi beruflech Virdeeler ugeet, tëschent dem Personal, wat an der UNISEC schafft, an dem Personal am Prisong oder am Centre de rétention.

Wéi gesot, et koume ganz vill Avisen eran, ganz vill interessant Avisen, niewent deene vun de Beruffskummeren och den Avis vun der CNPD, den Avis vun der Association nationale des communautés éducatives et sociales, dem Parquet, der Cour de justice, dem ORK an och der Mënscherechtskommission. Ech verweisen heifir op de schréfftleche Rapport, genausou fir d'Informatiounen, déi Dir géift brauchen zur Fiche financière.

Ech géif hei vun der Geleeënheet profitéieren, fir dem Här Patrick Thoma an dem Här Manuel Achten vum Ministère Merci ze soe fir d'Begleeden an d'Ënnerstëtze während der ganzer Zäit, wou mer un deem Projet hei geschafft hunn. An ech géif där neier Equipp ronderëm de Ralph Schroeder eng glécklech Hand wënschen an hirer neier, sécher net einfacher, awer sécher nobler Aufgab.

Domat ginn ech dann och den Accord vun der Demokratescher Partei. Ech géif mech freeën iwwer eng breet Zoustëmmung, a genausou géif ech mech freeën, wann Dir alleguerte géift gesond a monter aus der Vakanz zrëckkommen.

Merci.

► **Une voix.** - Très bien!

► **Mme Simone Beissel**, *Présidente de séance.* - Merci dem Här Rapporteur Gilles Baum. Als éischt ageschriwwen Riednerin hunn ech d'Madamm Françoise Hetto-Gaasch. Madamm Gaasch, Dir hutt d'Wuert.

Discussion générale

► **Mme Françoise Hetto-Gaasch** (CSV). - Madamm Presidentin, Dir Dammen an Dir Hären, fir unzefänke wëll ech dem Rapporteur, dem Gilles Baum, e ganz häerzleche Merci soe fir säi wierklech exzellente schréfftlechen an och mëndleche Rapport. Dës Gesetzestext gouf jo nach ënnert der CSV deposéiert a mëttlerweil sinn eng ganz Partie Adaptatiounen an och Amendementer derzou gemaach ginn.

D'Amendementer, déi des Regierung hei erabuecht huet, hunn eng ganz Partie vu Verbesserungen mat sech bruecht, déi mer och wierklech begreissen, esou zum Beispill, dass all Jugendlechen e sougenannten „projet individualisé“ kritt. Dat ass e ganz wichtegt Element, op dat den Här Baum och schonn am Detail agaangen ass, en Element, wat dem Erzéier erlaabt, dee Jonke wierklech individuell ze begleeden an eng reell Liewensperspektiv fir a mat him zesummen auszeschaffen.

Da begrëisse mer awer och nach ënner villen anere Saachen, dass d'Mesure d'isolement temporaire vun zéng op dräi Deeg reduzéiert gouf.

Här President, Dir Dammen an Dir Hären, mir haten zum Volet vun de Mesures a Sanctions disciplinaires déi lescht Woch nach en Amendement an der Kommissioun eragereecht, fir dem Personal sur place méi Moyenen ze ginn, fir direkt kënnen ze reagéieren, wann dee Jugendleche sech dann dernieftbehëlt. Mir hate proposéiert, fir niewent den normalen „mesures éducatives“, déi d'Educateuren am Alldag benotzen, sougenannt „mesures de bon ordre“ anzeféieren amplaz vun deenen „mesures disciplinaires“, déi elo am Gesetz stinn. Eis Mesures de bon ordre géifen näämlech keng Recours-méiglechkeet erlaben, mä au contraire, si géifen et erlaben, dass d'Educateure kéinten direkt op e Feelverhale vum Jugendleche reagéieren. Et wier domadder vill méi kloer fir dee Jonken, wat säin onerwënscht Verhalen als direkt Konsequenz géif mat sech bréngen.

Mir hunn eis dobäi un der franséischer Legislation orientéiert, esou wéi de Conseil d'État dat och a sengem virleschten Avis suggeréiert hat.

Madamm Presidentin, eisen Amendement hätt wesentlech zur Verbesserung vum Gesetz bäigedroen, a mir bedauern, dass d'Kommissioun net gewëllt war, sech déi néideg Zäit ze loossen, dësen Amendement am Detail ze studéieren - et waren dach awer eng ganz Partie Säiten - an dann an enger nächster Sitzung ze diskutéieren. Et wier jo definitiv net op dräi weider Méint ukomm, elo wou mer schonn esou vill Joren op dës Projet waarden. Esou wéi een déi lescht Woch konnt um Radio vum

neien Direkter héieren, leien d'Problemer näämlech och nach op enger ganz anerer Plaz, an ech wäert och herno dorobber ze schwätze kommen.

Ech wëllt awer kuerz op den Inhalt vun eise Amendement agoen. Mir sinn der Meinung, dass, esou wéi et elo am Gesetz virgesinn ass, et e falsche Message ass fir e jonken Delinquant, dass, wa soll eng Mesure disciplinaire gesprach ginn, hie ka Recours maachen an no engem Affekot froen. Dëst erlaabt näämlech an deem Fall net, dass den Erzéier kann eng direkt Äntwert op e Feelverhale ginn.

Vu wat schwätze mer? Ma et geet zum Beispill drëms, dass een engem Jonke muss kënnen soen, wann hien da während dem Mëttegiesse säin lesse widdert d'Mauer gejummt huet, dass hie soll dohinneergoen, dat oprafen an opbotzen, an dat, ouni dass hie seet, hien hätt e Recht op en Affekot.

Mir sinn der Meinung, dass ee muss kënnen direkt reagéieren, fir ze verhënnern, dass sech e Gefill vun Impunitéit kann entwéckelen, esou nom Motto: „Et geschitt mer jo souwisou näischt.“ Direkt reagéieren, dat wier laut eise Amendement zum Beispill: en Entschëllegungsbrëf verlaangen, eng Mediation unuerdnen, e Rappel à l'ordre aussprechen oder ee fir eng kuerz Zäit aus enger Gruppenaktivitéit ausschleissen, wann dat da sollt erfuenderlech sinn. An dat alles, ouni dass dee Jonke bei dës Mesures de bon ordre kann op pädagogesch a psychologesch Ënnerstëtzung zrëckgräfen an ouni dass hien d'Assistenz vun engem Affekot ka verlaangen. Ee prealabelt Gesprech géif natierlech där Mesure virausgoen, e Bericht géif alles festhalen an e järeleche Bilan mat alle Mesures de bon ordre géif dem Jugendriichter natierlech virgeluecht ginn.

Eis Mesures de bon ordre wieren am Fong geholl ze gesinn als esou eng Tëschestuf tëschent den normale Mesures éducatives an der Sanction disciplinaire, déi hirersäits jo ganz kloer eng Recoursméiglechkeet géif erlaben. Pour rappel, d'Sanction disciplinaire beinhalt jo, dass de Mineur fir 72 Stonne maximal kann an en Zëmmer gespaart ginn.

Do dernieft ass et fir eis awer och kloer, dass dat Ganzt och eng educativ Dimensioun an dëser Mesure de bon ordre enthält. Dee Jugendleche muss näämlech léieren, dass d'Zesummeliwen eng Rei Regele verlaangt, déi net verhandelbar sinn. Esou wéi et elo am Gesetz steet, ass dat awer net de Fall. Eis Proposition géif den Educateuren an hirer schwiereger Aarbecht am Alldag mat de Mineuren hëllefen, eng Handhab ze hunn, fir direkt kënnen ze reagéieren, e kloert Zeechen ze setzen; verschidden Niveauen deemno vu Mesuren a Sanktiounen, jee nodeem, wat ee sech zu Schold komme gelooss huet.

Madamm Presidentin, Dir Dammen an Dir Hären, et bleiwen awer nach eng ganz Partie Froen op. Et ass näämlech net kloer, wéini e jonke Mënsch iwwerhaapt an d'UNISEC kënnt. Dëst Gesetz bezitt sech jo op ganz Dräibuer, also do, wou d'Jonge sinn, an awer och op Schraasseg, wou d'Meedercher sinn, an net just op d'UNISEC. Et misst duerfir onbedéngt präziséiert ginn, wéi eng kriminell Faiten e jonke Mënsch an d'UNISEC bréngen. Hei feelee Kritären, kloer Kritären, déi fir jiddwereen erkennbar sinn.

Hei zu Lëtzebuerg ass et jo esou, dass des Decisioun der Appreciation vum Riichter ënnerläit. Mä ass et dann net awer esou, dass jonk Delinquanté kloer Messagë brauchen a kloer mussen wëssen, wéi ee Verhalen dann och wéi eng Konsequenz mat sech bréngt?

Da feelt eis och en Alterskritär: Ab wéi engem Alter kann een dann iwwerhaapt elo an d'UNISEC kommen? An et ass och widerhin net formell verbueden, e Mineur an de Prisong fir Erwuessener ze schécken. Och dëst misst endlech schwaarz op wäiss an dëst Gesetz ageschriwwen ginn.

Mir ënnerstëtzen awer och d'Fuorderung vum neien Direkter, dass niewent de Sitten Dräibuer a Schraasseg nach weider Strukturen iwwert d'Land fir Mineure missten ageriicht ginn, wou a kleng Gruppen eng ganz intensiv educativ Aarbecht kéint geleescht ginn. Dat ass leider relativ schwéier a Gruppe vu bis zu 20 Jonken ze bewältegen.

Mir soen och kloer, dass, wa mer wëllen e Liewensprojet ausschaffe mat dës Jonken, déi aus deenen ënnerschiddlechste Verhältnissen a mat deenen ënnerschiddlechste Bagagen a Virgeschichten hei landen, mir eis dann och mussen d'Moyene ginn. Mir brauchen dat néidegt Personal mat der néideger Qualifikatioun a mir mussen à même sinn, dee Jonken och no Dräibuer ze begleeden, hien am A ze behalen, e regelrechte Suivi ze assuréieren, fir ze verhënnern, dass dee Jonken no e puer Méint als gudde Bekannten alt nees zu Dräibuer lant.

Et gëtt do eng Partie flott Modeller am Aus-land, wou zum Beispill Educateure fräigestallt

ginn, fir esou e Jonke fir ee Joer an hirer Famill opzehuelen, ze begleeden, him ze hëllefen, aus deem - ech soen dat elo emol esou - Milieu pourri erauszekommen an e richtegen Neufank ze maachen. Mir brauchen och eng gréisser Sensibilisation fir dës Sujet bei de Leit, déi an hirer deeglecher Aarbecht mat schwieriger Jugendlechen ze dinn hunn. Vläch mussen Educateuren, Enseignanten a Proffe méi Berodung an och vläch aner pädagogesch Outiler kréien, fir dësen Challenge an hirem Alldag ze meeschteren.

Madamm Presidentin, Dir Dammen an Dir Hären, ech kommen zum Schluss. Ech bedauere wierklech, dass eisen Amendement net ugehall ginn ass, well en hätt dëst Gesetz kloer verbessert. Mä vu dass d'Personal vun der UNISEC schonn zanter Längerem agestallt ass a vu dass d'Gesetz ganz vill positiv, gutt Elementer beinhalt, wäerte mir als CSV dëst Gesetz stëmmen.

Ech wënsche mer just, dass esou séier wéi méiglech do nogebessert gëtt, wou et wierklech noutwendeg ass. An der Equipp ronderëm de Ralph Schroeder - do wëllt ech mech wierklech dem Gilles Baum senger Wiederuschléissen - wënschen ech ganz vill Erfolleg. Ganz vill Satisfaktioun bei Ärer wierklech delikater an och ganz schwieriger Aufgab!

Ech soen lech Merci fir d'Nolauschteren.

► **Plusieurs voix.** - Très bien!

► **Mme Simone Beissel**, *Présidente de séance.* - Merci der Madamm Hetto-Gaasch. Als nächste Riedner hunn ech den Här Georges Engel ageschriwwen. Här Engel, Dir hutt d'Wuert.

► **M. Georges Engel** (LSAP). - Merci, Madamm Presidentin. Léif Kolleeginnen a Kollegen: „Endlech!“, dat ass d'Gefill, wat ee bei der Ausschaffung vun dësem Projet huet, well bal 25 Joer nom éischte Rapport vun dem zoustännegen Europarotscomité an deem senger Kritik iwwert d'Aspäre vu Mannerjärege am Prisong zu Schraasseg kréie mer elo endlech e gesetzleche Kader, fir d'UNISEC a Betrib ze huelen.

A sengem leschte Rapport virun zwee Joer huet deen nämlechte Comité festgehalten, dass d'Sécherheitsunitéit zu Dräibuer nach ëmmer net hir Dieren opgemaach hätt, an dat trotz all deene villen nationalen an internationale Kritiken. Et gëtt deemno kee Grond, fir sech beim Vott vun dësem Gesetz op d'Schëller ze klappen. Ech gleewen och net, dass iergendeen hei am Sall dat anescht gesäit.

Madamm Presidentin, d'UNO-Konvention vum de Kannerrechter, déi och Lëtzebuerg ratifizéiert huet, seet ganz kloer, dass d'Aspäre vu Mannerjärege nëmmen a leschter Instanz soll kënnen méiglech sinn an da fir esou eng kuerz Zäit wéi nëmme méiglech.

Da solle Mannerjäreger, déi agespaart sinn, och human traitéiert ginn, am Respekt vun der mënschlecher Dignitéit. Mannerjäreger gehéieren duerfir net an e Prisong mat Erwuessenen, scho guer net, wa se éischer aus disziplaresche Grënn dohinner placéiert ginn an net, well se géint d'Gesetz verstouss hunn. Mä och dann ass deene Betroffene meeschtens besser gehollef, wa se eng psychologesch a sozial Ënnerstëtzung kréien, déi nëmme schwéier an engem Milieu carcéral ze garantéieren ass.

Oft verstoppe sech jo hannert hire Mëssdote perséinlech Dramen, sief et, dass se Affer vun Abusen am familiäre Krees waren oder net deen néidegen Encadrement vun doheem aus kruten. Et gi vill Grënn, firwat Jonker op dee schlechte Wee geroden. Mä d'Äntwert dorop vun der Gesellschaft muss prioritär déi sinn, ze probéieren, dës Jonker nees ze reintegréieren an d'Gesellschaft. Anescht wäerten dës Jonker näämlech spéider als Erwuessen op där schlechter Bunn widerfuere an ëmmer nees am Konflikt mam Gesetz sinn.

Madamm Presidentin, jer ech op de Contenu vun de proposéierten Ännerungen aginn, wëll ech awer och prinzipiell festhalen, dass dëst Gesetz an d'Problematik, déi drunhänkt, a Verbindung mam Gesetz iwwert d'Protection de la jeunesse ze kucke sinn.

Am Kontext vun eisen Aarbechte ronderëm dat Gesetz muss mir eis all hei an der Chamber och mat der Fro ausenanesetzen, ob an Zukunft Mannerjäreger iwwerhaapt sollen op Schraasseg kënnen kommen. Dir wësst, dass déi Méiglechkeet elo nach besteet, well d'Gesetz iwwert de Jugendschutz dem Jugendriichter déi Kompetenz iwwerléisst.

An hirem Avis argumentéieren de Parquet vun Dikrech an d'Jugendriichter vun Dikrech a Lëtzebuerg, dass et trotz der neier Struktur och nach méiglech muss sinn, provisoresch Man-



nerjäreger zu Schraasseg ze placéieren. D'Iw-werleeung dohannert ass déi, dass e Riichter sech net direkt eng Iddi ka maachen, wéi geféierlech oder net ee Jonke wierklech ass, an awer och den Ordre public an d'Sécherheet vun de Leit muss duerfir am A behalen.

Mir hoffen natierlech, dass, andeems mer elo eng Alternativ mat der UNISEC hei schafen, et net méi zu esou Decisiounen vun de Riichter kënnt. Mir mengen, et wär awer vill besser, ee fir alle Mol fir Kloeerheet hei ze suergen an dann och ee fir alle Mol hei ze tranchéieren.

Madamm Presidentin, mir schafen net nëm-men de Kader fir d'UNISEC mat deemem Projet, mä allgemeng fir déi verschidden Unitéite vum Centre socio-éducatif. Aus virun allem deene Grënn, déi ech elo grad am Kader vum Jugendschutz erwänt hunn, begrësse mer, dass d'Gesetz d'Méiglechkeet gëtt, weider zouen Unitéiten nieft der UNISEC jee no Besoin ze schafen.

An enger ganzer Rei vun Avisen zu deemem Projet gëtt bedauert, dass net méi Plazen an der UNISEC virgesi sinn. Ech mengen, dass mer awer Spillraum hu fir de Fall, wou mer méi Plaz hei géife brauchen.

Allgemeng begrësse mir déi zousätzlech Rechter, déi déi Betraffe vum sozioeducativen Zenter mat deemem Gesetz kréien, dat am Beräich vun den disziplinaresche Mesuren a Sanktiounen, de kierperleche Fouillen an och dem Schutz vun de perséinlechen Donnéeën. All dës Beräicher gi kloer encadréiert. Disziplinaresch Mesuren a Sanktiounen ginn definéiert an et gi Recoursen agefouert, wann et zu esou Mesuré kënnt.

Et gëtt kloer festgehalen, a wéi enge Fäll déi Mesuren a Sanktiounen spillen an och wie berechtigt ass, déi kierperlech Fouillen duerchzeféieren, souwéi wien Accès kritt op d'Donnéeën vun de Mannerjärege. Dat huet de Rapporteur a sengem Rapport exzellent ausgefouert hei.

Ech ginn net op all Detail an, dat géif och de Kader vun dëser Interventioun hei sprengen. Ech wëlt awer gäre kuerz nieft der exzellenter Aarbecht vum Rapporteur och déi exzellente Aarbecht vun all deenen Instanzen wierdegen, déi hei en Avis zu deemem Projet gemaach hunn. An dat waren der vill! Mä ech mengen, mir sinn eis all eens, dass dat enorm gehollef huet, fir den initialen Text a groussen Deeler nozebesseren. Ech wollt dat hei och nach eng Kéier ënnersträichen an deene Leit och e grouse Merci soen.

Madamm Presidentin, wéi ech schonn am Ufank betount hunn, ass fir eis als LSAP ee vun deene wichtegste Punkten d'Aféierung vum Projet individualisé. Dësen definéiert d'Prise en charge vum Pensionnaire während an no sengem Openthalt am Centre, dat, fir eng beschtméiglech Reintegratioun an d'Liewen an der Gesellschaft ze garantéieren. An dat muss eist Zil sinn! Déi Jonk, déi do an där Unitéit sinn, déi kommen erëm eng Kéier eraus. An et muss duerfir ofgeséichert sinn, dass déi Jonk och an engem Kader do encadréiert sinn, deen hinnen et erméiglecht, sech och erëm eng Kéier herno an der Gesellschaft erëmfefannen.

Dobäi gëtt de Parcours vum Jonke berücksichtegt an et gëtt festgehalen, a wéi enger Unitéit a vu wéi enger Equipp hie betreit gëtt. D'Necessitéit vun esou engem pädagogeschen an educative Projet gouf och a villen Avisen ervirgehuewen, dorënner och dee vun der ANCES, der Associatioun vun den educativen a soziale Communautéiten, deene Leit also, déi um Terrain schaffen. An deem ass och Rechnung gedroe ginn. An dat ass och gutt esou.

Den individualiséierte Projet gëtt zesumme mam Concernéierten ausgeschafft. Och dat begrësse mer, well et de Mannerjärege matabënnt an him esou natierlech och dann e Responsabilitéitsgefill gëtt, d'Gefill, och eescht geholl a selwer respektéiert ze ginn.

Och d'Eltere kréien dee Projet gewisen, fir dass och si um Suivi vun den educativen a soziale Moossnamen kënne deelhuelen a mat an d'Responsabilitéit geholl kënne ginn.

Madamm Presidentin, fir d'Ëmsetzung vun esou individualiséierte Projekte brauch een dat néidegt qualifizéiert Personal. Och op deem Niveau komme mat deemem Gesetz déi néideg Annerungen.

Ech wëlt hei och dovunner profitéieren, fir deene ganz engagéierte Leit aus deem Secteur eng Kéier e grouse Merci ze soe fir hir dagdeeglech Aarbecht.

Wéi ziviliséiert eng Gesellschaft ass, moosst sech dorunner, wéi se mat hire Prisonnéier

ëmgeet. Déi Citatioun, déi emol eng Kéier dem Camus oder emol eng Kéier dem Dostojewski ugerechent gëtt, ass nach méi treffend, wa mer iwwert d'Aart a Weis schwätzen, wéi mer mat Mannerjärege ëmginn, déi agespaart sinn. Et muss eis nach eng Kéier ze denke ginn, dass mer dëse Projet net éischter schonns gestëmmt hunn. Ech hoffen, dass mer an Zukunft esou Froen, déi Jonker a virun allem Jonker mat Problemer uginn, méi prioritär kënne behandelen. Op alle Fall sinn ech awer frou, dass mer en haut kënne stëmmen. Dat soll dëse Projet net an e schlecht Liicht bréngen, och wa mer et hätte vläicht éischter missen oder kënne maachen.

Ech soen lech op alle Fall Merci fir d'Nolauschteren an ech ginn heimadder den Accord vun der LSAP-Fraktioun.

► **Mme Simone Beissel**, *Présidente de séance*.- Merci dem Här Engel. Als nächsten ageschriwwene Riedner hunn ech den Här Claude Adam. Här Adam, Dir hutt d'Wuert.

► **M. Claude Adam** (*déi gréng*).- Merci, Madamm Presidentin. Ech wëll fir d'Éischt dem Rapporteur, dem honorabele Gilles Baum, Merci soe fir säin ausféierleche mëndlechen a schrëftleche Rapport. De Gilles Baum huet ganz zu Recht op d'Wichtigkeet higewisen, dass mer eis hei eng zolidd rechtlech Basis ginn, wa mer iwwert den Émgang mat enger Population vulnérable schwätzen. En huet drop higewisen, dass mer d'Mesures disciplinaires, d'Sanktiounen, d'Fouillen, den Dateschutz an deemem Gesetz och kloer festgeluecht hunn.

An ech wëll och der Vertrieederin vun der CSV Merci soen, dass se zwar hei eng kritesch Ried gehalen huet, awer och gesot huet, dass dee Projet hei eng Rei Verbesserungen huet vis-à-vis zum urspréngleche Projet, an och dass se d'Kéier kritt hunn, fir fir de Projet ze stëmmen. Well wann d'CSV déi Kéier net kritt hätt, dat hätt mäi Bluttdrock awer hei an d'Héicht bruecht, well et awer och en...

► **Une voix**.- Dat wier net gutt virun der Vakanz.

► **M. Claude Adam** (*déi gréng*).- Dat wier net gutt virun der Vakanz.

Well dat Argument, wat d'CSV seet vun deem Amendement, dee si erabruucht hunn, dass mer deen net ugehall hätten: Bon, ech stinn do derzou! Et geet net drëm, fir just e Message un déi Jugendlech ze ginn, et geet hei och ëm Rechtsstaatlechkeet. Et geet ëm international Konventiounen, déi mer ënnerschrifwen hunn. Et geet ëm de Schutz vun enger Population vulnérable. An ech mengen, dass dat, wat mer hei an d'Gesetz geschriwwen hunn, dat Richtegt ass. A mir stinn op alle Fall 100%eg do derzou. An ech sinn och frou, dass d'CSV trotzdem fir de Projet stëmmt.

Da kommen ech e bësselen op den Historique vun deem Gesetz, well eigentlech sinn déi gréng ëmmer ganz kritesch gewiescht mat deem, wat elo zu Dräibuer ass, wat mer dann haut fäerdegstellen. An ech maachen et net immens laang, mä trotzdem ass et mer wichtig, nach eng Kéier op den Débat d'orientation ze verweisen, deen am November 2003 hei war. Do hate mer am Virfeld, wéi dat Gesetz iwwert d'Schafung vun engem Centre de ré-tention am Gespréich war, schonn als Gréng hei viru 14 Joer eng ganz Rei Propositionen gemaach, déi alleguerten op eng Dezentraliséierung higeziilt hunn.

Mir waren och net déi Eenzeg, déi grouss Zentre beklot hunn. Zentren, wou jonk Mënschen zesummegefouert gi sinn, déi besser net zesummegefouert gi wieren. Den ORK hat déizäit an dëselwecht Richtung argumentéiert an och eigentlech de ganze professionnelle Milieu hat virun deene groussen Zentre gewarnt. déi gréng haten och schonn an där Debatt eng seriö Kanner- a Jugendpsychiatrie gefuerdert. A mir hate schonn deemools gesot, dass dat, wat um Kierchberg virgesi wier, ze begrësse wier, mä awer eventuell net géif duergoen.

Mir haten och deemools scho gesot, et géif net genuch Ursacheversuchung bedriwwen ginn. Et géif just bei simplistesche Verallgemeinerungen, bei virgefaasste Meenunge bliewen. Mir haten deemools beklot, dass et iwwer Jonker mat Problemer, iwwert d'Jugenddelinquenz keng genee Chiffere géif ginn. Bei mësshandelte Kanner stoung an deem Bericht deemools: «Il n'existe pas de statistiques officielles.» Datselwecht war de Problem, wat d'Drogen ugeet. Do heescht et: «...difficile de se faire une idée précise de l'ampleur et du phénomène et ceci d'autant plus que les statistiques ne distinguent pas entre les prévenus mineurs consommateurs de drogues et les dealers.» An och wat d'Troubles mentaux et du comportement ugaangen ass, huet et geheescht: «Nous ne disposons pas de chiffres permettant de circonscrire plus nettement l'ampleur de ce type de phénomène.» Wéi gesot, dat war viru 14 Joer.

Mir haten dunn de 5. Mee 2004 hei an der Chamber d'Gesetz iwwert d'Schafung vun enger Sécherheitsunitéit debattéiert an dat Gesetz ass deemools och gestëmmt ginn, allerdings géint d'Stëmme vun déi gréng a vun der ADR.

Fir eis hat deemools d'Dagmar Reuter-Angelsberg ënner anerem gesot a kritiséiert, dass déi Unité de sécurité géif op Dräibuer kommen. A si hat gesot, d'Unité de sécurité kéim eben dohin, an ech zitéiere se: „...wou et am schnellsten, am beschten a mat dem geréngste Widerstand geet.“

An eigentlech hat déi zoustänneg Ministesch, d'Madamm Marie-Josée Jacobs, dat och esou gesinn. Si hat d'Decisioun vun der Regierung haaptsächlech domat verteidegt, dass se gesot huet, si hätt keen anere Site fonnt an et hätt och keen aneren ee Site fir si fonnt.

Et huet also 13 Joer gedauert, fir d'Unité de sécurité op deem Site betriebsfäerdeg ze maachen, „wou et am schnellsten, am beschten a mat dem geréngste Widerstand“ gaangen ass. Et ass scho gesot ginn hei: „Mir mussen eis net onbedéngt op d'Schëller klappen“, mä mir sollen awer trotzdem frou sinn, dass mer dee Projet dann elo kënne haut ofschléissen, do-duerch dass mer d'Gesetz stëmmen.

Ech hat och - et ass schonn dervu geschwat ginn - den Interview nogelauschert vun dem neien Direkter vum Centre socio-éducatif, deen Invité bei RTL war. Mir hu 60 Jongen zu Dräibuer, 32 Meedercher zu Schraasseg, an dat ass och ganz wichtig an interessant: Déi hunn al-leguerte verschidde Profiller. An ech mengen, et ass e bësse kuerz gegräff, wa mer just soen, do wieren der vill, déi keng gutt Hand haten, déi se geleet hat. Wann et esou wier, dann... Ech mengen, domadder culpabiliséiere mer och Elteren, déi déi gutt Hand haten a wou awer Saachen net esou gelaf sinn, wéi si a wéi mir eis et gewëncht hätten.

Mir hunn do bei de Jonke Jugendlecher, déi no un der Klengkriminalitéit sinn, mir hunn der, déi haaptsächlech e Problem vun Absentisme scolaire haten, Cannabiskonsum, mir hunn der och, déi aggressiivt Verhalen hunn, a mir hunn der och, déi wierklech e schwéiert kriminell Potenzial hunn.

De Jugendriichter schéckt déi Jonk dohinner aus Jugendschutzgrënn, fir se aus hirem Milieu erauszehuelen an hinnen eng Chance ze ginn, fir op e besseren, richtige Wee ze kommen. An der Moyenne bleift esou e Jonken ee Joer zu Dräibuer oder zu Schraasseg. An déi Zäit, wou en do ass, déi soll genotzt ginn, fir eng Perspektiv ze entwéckelen, en individuelle Projet opzebauen, wat no där Zäit zu Dräibuer ka geschéien. Zu Dräibuer si wierklech net just krimineller. Zu Dräibuer si Jonker, déi sozial net funktionéieren. Et sinn och Jonker, déi psychesch krank sinn. Duerfir ass eng Kollaboratioun mat der Psychiatrie och ganz wichtig.

Mir wëssen, dass do 80, 90 Leit schaffen, a mir wëssen och, dass dat der net genuch sinn. An den Direkter hat och eise Premier gelueft a sengem Interview. Deen huet gesot, mir misste méi an d'Personal investéieren an dat géif een och scho spieren: 18 Leit kënne se elo nei astellen. A wann een dat nach een, zwee Joer mécht, dann hu mer och genuch Leit.

Mir hunn am Moment dräi Gruppe vun zwanzeg. Déi Gruppe sinn ze grouss - do si mer eis, mengen ech, alleguerten eens heibannen -, eben ze grouss, fir eng geziilt psychologesch a pädagogesch Aarbecht ze maachen. An duerfir géife mer eis - mir hunn eis dat scho viru 14 Joer gewëncht - verschidden a vill kleng Infrastrukturen, déi iwwert d'Land verdeelt sinn, wënschen. Ech kommen nach kuerz dorobber zréck.

D'UNISEC ass prett, mä d'Gesetz feelt nach. Abee, haut wäerte mer jo dann d'Gesetz stëmmen. A wann et dann a Kraaft trëtt, da kënne bis zu zwielef Jugendlecher opgeholl ginn. Et ass Plaz fir véier Gruppen à dräi Schlofkummen. Dat heescht, wann zum Beispill den zéngte Jugendlechen e Meedchen ass, dann ass deen eeleften an deen zwieleften automatesch och e Meedchen, well mer an deene Gruppen d'Geschlechter getrennt hunn.

Et ass esou, dass an der UNISEC souwuel Jonge wéi Meedercher kënne opgeholl - oder muss ee soen „agespaart“? - ginn. Den oppene Beräich vum Centre socio-éducatif ass jo soss no Geschlechter getrennt: Dräibuer fir d'Jongen, Schraasseg fir d'Meedercher. Mä de Schoulberäich ass zum Beispill awer och mixte.

D'UNISEC zu Dräibuer ass net déi ideal Léisung. Et gëtt eng ganz Rei Punkten, déi duerch de Site net glécklech sinn. Zum Beispill ass de Schoulwee och den Ufaartsweg fir d'Police bei d'UNISEC. Dat ass keng gutt Symbolik. Ech hat och gesot virun, dass d'Populatioun vun de Jonken hei ganz heterogen ass. De Risk ass, dass Täter an Affer, zum Beispill wat Abus sexuel betrëfft, sech ze no kommen. An dee

Problem kritt een ni ganz aus der Welt geschafft, mä hei ass en awer och nach e bëssleche méi akut.

De Jugendschutz, dat huet d'Madamm Hetto richtig gesot, huet keng Grenz no ënne gezunn. Theoretisch kënne ganz jonk Kanner op Dräibuer kommen. Mä de Jugendrichter kann awer och iwwer 18 Joererausgoen. Den Openthalt ka bis 21 Joer verlängert ginn. Normalerweis gëtt et eng Verlängerung vu sechs Méint oder vun zwielef Méint. Dat sinn Ausnahmen, mä déi gi geschwat. An et kann och e Jugendleche selwer eng Verlängerung iwwer 18 Joererausfroen. Et kënne also och Majeuren an där Struktur sinn.

Dat stellt natierlech déi Responsabel vun der UNISEC och virun eng Rei organisatoreschen Problemer. Fir si ass et wichtig ze wëssen, ob dann elo definitiv keng Jugendleche méi an de Prisong op Schraasseg kommen oder net. Firwat ass dat wichtig? Majo da stellt sech d'Fro: Ass Dräibuer, d'UNISEC dann elo déi lescht Statioun? Oder ass et eventuell just déi zweetlescht, dass nach e Prisong hannendrukënt?

D'UNISEC ass e Prisong. Awer well et ëm Jugendlecher geet, ass et nach méi wichtig, dass eben all Jugendlechen do säin individuellen Zukunftsplang gemaach kritt. Vum éischten Dag u muss een d'Fro stellen: Wat geschitt no Dräibuer?

Zu Dräibuer an der UNISEC ass een zéng Stonne pro Dag agespaart. Da bleiwe 14 Stonnen an der Gemeinschaft, wuelgemierkt an der Gemeinschaft vun enger Infrastruktur, déi e Prisong ass. E Jugendleche kënnt maximal fir dräi Méint an d'UNISEC. An déi dräi Méint kënne vum Jugendrichter awer verlängert ginn. Wann een dat héichrechent, da wier et denkbar, dass all Joer bis zu maximal 48 Jugendlecher an der UNISEC landen. An da muss ee sech natierlech d'Fro stellen: Wat geschitt mat deenen no dem Passage an der UNISEC?

A fir eis schéngt et kloer ze sinn: Dat dierf dann net déi oppe Struktur zu Dräibuer sinn. Wann een no dräi Méint erauskéim aus der UNISEC an da géif een op Dräibuer kommen, dat kéint heeschen, dass seng Kollegen, déi aner Jugendleche, déi do sinn, engem de Stempel géifen opdrécken: „Du bass ee vun deenen, déi do dra waren.“ Dat wier net glécklech. Et kéint och heeschen: „Du bass en Haarden, e King, well du waars jo dobannen.“ An ech mengen, dass wier net besser.

Dat wier also zweemol nefaste. An duerfir brauche mer och nach weider Strukturen, déi dezentral organiséiert sinn, fir e Suivi ze maachen, deen, mengen ech, mer als Gesellschaft och vis-à-vis vun deene Jonken, déi déi Problematiken hunn, déi se dohinnergefouert hunn, brauchen.

Dat gesot, kéinte mir als Gréng eigentlech, wa mer eis extrem konsequent wieren - mir waren dergéint, dass mer dat op Dräibuer kréichen -, dat jo net matdroen. Mir soen awer, an et huet sech jo net gewisen, dass awer ganz vill Iwwerleeungen an der Tëschenzäit geschitt sinn. Mir hunn eng Evolutioun, wou ganz vill Moyene kreéiert gi sinn an deene leschte Joren.

(**M. Mars Di Bartolomeo reprend la présidence.**)

A mir sinn och ganz zouversichtlech, dass déi Entwécklung weidergeet, dass mer och musse weiderdenken, wéi eng Strukturen duerno kommen. An duerfir bréngen ech den Accord vun der grénger Fraktioun zu deemem Projet de loi an ech soen lech Merci fir Aert Nolauschteren.

► **Plusieurs voix**.- Très bien!

► **M. Mars Di Bartolomeo**, *Président*.- Merci och. An dann huet d'Wuert den Här David Wagner.

► **M. David Wagner** (*déi Lénk*).- Merci, Här President. Ënner engem Centre socio-éducatif de l'État kann ee sech villen virstellen. Do denkt een zum Beispill un eng dezentraliséiert sozial Struktur, déi no baussen op ass an déi Jugendlechen, déi sozial determinéiert Verhalensproblemer hunn, am schoulesche Kader negativ opfale beziungsweis aus der Schoul ausgeschloss sinn, eng ganz Palett u moossgeschneiderte pädagogeschen a psychosoziale Betreuungs-methoden ubitt, gradesou wéi e schouleschen Encadrement an eng ganz Rei Fräizäit-a professionell Aktivitéiten, déi de Jugendlechen et méiglech maachen, esou vill wéi méiglech an d'Gesellschaft ageschloss ze ginn.

Et géif ee sech an deem Fall dee Kader vum Centre socio-éducatif als agreabel, inklusiv an erhuelend virstellen, mat Gréngflächen, Raum fir Sportméiglechkeeten a Méiglechkeeten, fir Undeel um gesellschaftleche Liewen ze hunn.

Här President, wann een dat humanistesche upéckt, stellt ee sech e Kader vir, deen näischt mat engem Centre pénitentiaire ze dinn huet. An deemem Gesetzestext ginn dës Visiounen vun



Chambre des Députés

Compte rendu officiel

Supplément commun aux quotidiens:

Luxemburger Wort, Tageblatt, Lëtzebuurger Journal, Zeitung vum Lëtzebuurger Vollek

Contenu rédactionnel:

Service du compte rendu de la Chambre des Députés
Service des relations publiques de la Chambre des Députés
Tél. 466 966-1

Conception, saisie de texte et mise en page:

Polygraphic SA, Esch-sur-Alzette

Concept et coordination générale:

BRAIN & MORE, agence en communication, Luxembourg

Imprimeries:

Saint-Paul Luxembourg SA 2, rue Christophe Plantin L-2988 Luxembourg
Editpress SA 44, rue du Canal L-4050 Esch-sur-Alzette

der Jugendbetreuung a vum Jugendschutz awer zersteiert, wa sâin Inhalt sech ausschliisslech op d'Aweigung vun enger zousätzlecher Unité de sécurité richt.

Dës UNISEC ass dann u sech och gläichgestallt mam Centre pénitentiaire vu Schraasseg a bitt hirem Personal déiselwecht Traitementer an Avantagë wéi am Prisong un. Et misst een hinnen dës Aarbecht an engem „ganz geféierlechen“ Environnement mat „ganz geféierlechen“ Insassen - genee gezielt zwielef Stéck! - schmackhaft maachen.

D'Auteure vun dësem Projet de loi ginn also d'office dervun aus, datt et sech bei den zukünftege Pensionnairen ëm geféierlech Krimineller handelt, déi ee misst aspären an déi vun engem muskuléise Personal betreit misste ginn. D'Wuertwahl, fir dës Jugendlech ze definéieren, ass an deem Sënn stigmatisierend: „jeune délinquant“, „jeune avec un passé criminel“ et cetera. Si ass awer och a Kontradiktion mat der protektioneller Approche, déi gesetzlech duerch d'Loi de la protection de la jeunesse vertrueden ass. Dat ass vläicht, well se an de professionelle Beräicher vun der Justiz, mä och am soziale Secteur falsch interpretéiert gëtt a mëttlerweil dës diskriminéierend a stigmatisierend Terme fir Jugendlecher oder Mannerjäreger, déi deviant Verhalensweisen hunn, an den normale Sproochgebrauch iwwer gaange sinn.

Wat gëtt et vun Alternativen, fir d'Floskel „surveiller et punir“ ze ersetzen? Wéi wär et mat „accompagner et valoriser“? An dësem Projet de loi geet et ëm d'Aspäre vu Mënschen, déi nach net erwuesse sinn. Beim Aspäre muss ee sech folgend Froe stellen: Wat bréngt et der Gesellschaft? An och: Wat bréngt et deene Mënschen, déi agespaart goufen an erëm souwiso op fräie Fouss kommen? Si se net virprogramméiert, fir esou weiderzefuere wéi vir drun an esou engem Mënsch oder der Gesellschaft ze schueden? Sinn déi Jugendlech, déi keen Delikt virzeweisen hunn an trotzdeem zu Dräibuer gelant sinn, well se vläicht familiär Problemer haten an awer a Kontakt mat jonken Delinquantë komm sinn, net duerch eng potenziell Delinquantëschoul gaangen?

Et ass evident, datt en Delikt muss sanktionéiert ginn, och bei jonke Leit. Mä ass d'Ewechspäre mat enger repressiver Mentalitéit déi richtig Sanktioun? Jiddwereen, deen eppes vum Fach versteet, seet Neen. An dat ass och scho laang bekannt. Mä et schéngt zu Lëtzebuerg nach net de Fall ze sinn.

Här President, ech weisen och nach zum Schluss op den Avis vun der Association nationale des communautés éducatives et sociales hin. Dësen Avis ass a mengen Aen exemplaresch, well e vu Leit geschriwwen ginn ass, déi d'Erfahrung an déi néideg Kompetenzen um Terrain vun der Jugendbetreuung mat sech bréngen. Hir Fuerderungen a Kritikken zu dësem Projet de loi, op déi ech elo net kann agoen, mä déi et derwäert sinn, gelies ze ginn, hätten tel quel kënnen dëse Projet de loi ersetzen. An domat wäer mer hei zu Lëtzebuerg sécherlech e gutt Stéck weider a Saache vun engem modernen Encadrement an der Prävention vun der Délinquance juvénile.

Här President, de Placement vun deviante Jugendlechen an zouenen Institutione wéi der UNISEC zu Dräibuer misst als leschte Recours gëllen. Dat ass awer elo an dëser Fassung guer net de Fall. Do gi jo eng Partie Saachen opgezielt, déi duerno an d'Sanctions disciplinaires erakommen. Dat ka vu sexuellen Ugrëff oder iwwerhaapt vun Ugrëff op d'Personal bis op de repetitiven Netrespekt vum Règlement d'ordre intérieur goen, wéi och op eben de Fait, datt een eng Wick fëmmt. An dat alles gëtt am selwechte Pak agepaakt an net als leschte Re-

cours, als wat den Isolement ugesi gëtt, esou agefouert.

Et gëtt esou vill aner präventiv a reparativ Methoden, déi d'Participation vum Jugendleche fuerderen an de Jugendlechen individuell ënnerstëtzen a valoriséiere bei der Elaboration vu sengem Liewensprojet. Dat ass natierlech, da kann ee soen: „Mir hunn esou e Liewensprojet virgesinn.“ Jo, mä de Problem ass: Dat geschitt eréischt, wann ee bis do gelant ass! An a Wierklechkeet misst ee jo derfir suergen, datt et vir drun iwwerhaapt kéint a Kraaft gesat ginn. Dat heescht, mir si weiderhin an der Logik vun der Repressioun, vum Ewechspären, wat eng archaesch Logik ass, déi scho längstens a Fro gestallt gouf.

An der Justiz misst fir d'Éischt dann op dës Methoden zrëckgegraff ginn, fir dat Schlëmmst, dat Käschtespillgeest an dat mat den negativste Konsequenzen op d'psychologescht an d'soziaalt Wuelbefanne vun dëse Jugendlechen, also d'Aspären, ze verhënnere.

Här President, dëst Gesetz gëtt, wéi all Gesetz, vum Grand-Duc Henri ënnerschiwwen. Ech mengen, a Wierklechkeet, fir et méi zäitgeméis ze maachen, hätt ee sech och à la limite kënnen virstellen, datt de Grand-Duc Wëllem de IV. et ënnerschiwwen hätt, well mir sinn nach ëmmer an enger Logik, déi sech an d'19. Jorhonnert areit. Dofir wäerte mer géint dëst Gesetz stëmmen.

Ech soen lech Merci.

► **M. Mars Di Bartolomeo**, *Président*.- Mir sinn domat um Enn vun der allgemenger Diskussioun ukomm. An d'Regierung huet d'Wuert: den Här Educationen- a Jugendminister.

Prise de position du Gouvernement

► **M. Claude Meisch**, *Ministre de l'Éducation nationale, de l'Enfance et de la Jeunesse*.- Merci, Här President. Dir Dammen an Dir Hären, e grouse Merci virun allem un de Gilles Baum, de Rapporteur, awer och un all d'Intervenanten.

D'Regierung ass mat all deene Virriedner d'accord, déi fannen, datt déi Situatioun, wéi mer se haut zu Dräibuer hunn, dee Centre socio-éducatif, wéi en do fonctionnéiert huet, plus déi UNISEC, déi jo mat dësem Gesetz dann och soll opgoen, keng glécklech Léisung ass. D'Regierung huet hei Fakte virfonnt, déi a Bëton geschafte goufen, bei deene mer allerdéngs da musse kucken, dat Bescht draus ze maachen.

An d'Regierung ass sech absolutt bewusst, datt dat weder fir deen dote Site eng glécklech Situatioun ass, nach fir Cohabitatioun vun deene ville Jonken, souwuel vun deenen, déi an där Unité de sécurité ënnerbruecht sinn, wéi och deenen, déi am reschtliche Centre socio-éducatif de l'État do ënnerbruecht sinn, datt déi absolutt net glécklech ass aus villen, ville Grënn, déi meescht pädagogescher Natur, anerer topografescher Natur, well de Site et einfach net hiergëtt, fir dat doten eigentlech richtig esou kënnen ze geréieren.

Trotzdeem musse mer elo an der noer Zukunft dat Bescht draus maachen. An dat maache mer mat dësem Gesetz. Virun allem ass de grouse Quantesprong, dee mer trotz allem hei mat dësem Gesetz kréien, datt d'Land endlech souwuel déi technesch wéi och déi logistesche Viraussetzung schafft, fir datt Jugendlech Krimineller net méi mussen an engem Prisong ënnerbruecht gi mat Erwuessenen, mä hei kënnen ënner aneren Ëmstänn nach ëmmer agespaart ginn, mä awer och encadréiert ginn. Dat ass sécherlech dat, wat iwwer Jore gefuerdert ginn ass, wat mer och hei mat der Ouverture, wann dat Gesetz hei gestëmmt gëtt, ab dem 1. Oktober wäerte geschafen hunn.

Ech sinn och mat all deenen absolutt d'accord, déi de Mëtteg hei gesot hunn: „Mir mussen eis och d'Moyene ginn, fir dat doten ze geréieren, fir déi Jonk kënnen ze encadréieren.“ Et ass genau dat, wat d'Regierung och an deene leschte Jore gemaach huet.

De Claude Adam huet vun den 18 Poste geschwat, déi dëst Joer am Numerus clausus virgesi si fir de Centre socio-éducatif Dräibuer a Schraasseg. A mir wëssen, datt et domadder sécherlech och an den nächste Joren nach net duergeet. Do komme mer vu ganz, ganz wäit hier. An et ass och duerfir, datt de Premier-minister ugekënnegt huet, datt mer eis bei Strukture wéi deenen doten, awer och anere staatleche Strukturen, mussen d'Logik vun engem Contingent ginn. Dat heescht, wa mer méi Jonker mussen encadréieren, datt mer och deementspreechend méi personell Ressourcë kréien.

Dorënner, ënnert deem Personalangel, dee mer haut do wierklech hunn, leiden net nëmmen déi Jonk. Do leiden och déi, déi professionell do schaffen, well et awer op Dauer zu enger Iwwerforderung féiert. Duerfir e grouse Merci un all déi, déi bis elo do intervenéiert hunn an déi alles ginn zum Wuel vun deene Jonken! Et si si, déi eigentlech den Esprit vum Centre socio-éducatif de l'État do ausmaachen.

Gläichzäiteg maache mer Efforten, an et si weiderer ze maachen, fir datt mer och déi Schoul, déi do um Site fonctionnéiert, dotéiere mat Ressourcen, déi et och wierklech erlaben, datt eng Kontinuitéit an der Education ka garantéiert bleiwen, datt mer och do qualifizéiert Schoulpersonal hikeréien. Och do sinn eng Rei vun Initiative geholl ginn, déi dohinner wäerten zéien.

Mir dierfen net vergiessen, datt mer eis hei insgesamt virun allem och ëmmer d'Fro musse stellen: Wat ass vir drun schifgaangen? Ech denken, datt do de Stat net all Méiglechkeet huet, mä mir kënnen sécherlech nach méi maachen. Ech war dach awer touchéiert, wéi de Félix Braz als deemools neie Justizminister mat mir op Dräibuer kucke war an ee jonke Mënsch eis do presentéiert ginn ass, deen do dunn encadréiert gouf, a mir herno gesot kritt hunn: „Deen doten huet en IQ vun 130 an e bréngt et net fäerdeg, déi intellektuell Capacitéit eigentlech oder seng Motorkraaft op d'Strooss ze kréien, seng intellektuell Capacitéit am Alldag och wierklech ëmzesetzen an eppes draus ze maachen.“

Nun, do musse mer kucken a ganz ville Betreuungstrukturen, an eise Schoulen ënner anere, a fir genau dat dote Beispill jo och, wat Héichbegaabter zum Beispill ubelaangt, mä och Jonker, déi aner spezifesch Besoinen hunn, wäerte mer jo och dee Secteur nach eng Kéier ëmmodelen an ëmgestalten an eis méi Moyene ginn, fir Jonker do kompetent ze ënnerstëtzen, wa se spezifesch Besoinen hunn, fir eng Entwécklung an déi dote Richtung an Zukunft och ganz fréi kënnen ze evitéieren.

Ee Punkt, deen eis hei, mengen ech, dann nach auserneendividéiert, dat ass deen Amendement vun der CSV, deen an der Kommissioun diskutéiert gouf, wou mer och e puermol iwwert de Prinzip geschwat hunn a wou ech dem Parlament net konnt roden, mat op deen dote Wee ze goen. A mir hu konkret Ursachen an déif gräifend Ursachen, fir dat och net ze maachen.

Éischtens gëtt proposéiert, eng weider Kategorie vu Mesures de bon ordre anzeféieren. Nun, wa mer kucken, wou mer vun deem éischten initialen Text hierkomm sinn, deen och nach vun der Virgängerregierung deposéiert gouf, a wat de Statsrot dozou gesot huet - well do ware verschidde Kategorie virgesinn, och nach déi vun de Mesures éducatives, net nëmmen d'Mesures disciplinaires an d'Sanctions disciplinaires, wéi mer se elo am penalen Text haut de Mëtten hei virleien hunn -, de Statsrot huet virun allem do en Amalgam vun den eenzelne Mesurë gefaart.

A wann ech de Mëtten héieren hunn, wat d'Françoise Hetto hei als e Beispill, fir esou eng Mesurë de bon ordre ze huelen, genannt huet, dann iwwerschnéit dat sech awer scho mat de Mesures disciplinaires, déi elo am Text hei virgesi sinn. An duerfir hätt mer mat esou enger Aféierung vun enger weiderer Kategorie direkt erëm deen Amalgam gehat, deen awer ganz schaarf vum Statsrot och kritiséiert ginn ass a wou mer eis vill Méi ginn hunn an den Diskussiounen an de leschte Joren - net an de leschte Méint, mä an den Diskussiounen an de leschte Joren -, fir dat ze evitéieren an do derlaanschtzekommen.

Dee Punkt, deen awer nach op vill méi eng staark Opposition vun der Regierung trëfft, dat ass deen, datt Der sot, datt bei deene Mesuren, déi hei virgesi sinn, de Mesures disciplinaires an de Sanctions disciplinaires, kee Recours beim Jugendrichter dierft geholl ginn.

(Interruption)

Mä et ass esou, datt et haut de Fall ass, datt all Jonken, deen am Centre socio-éducatif de l'État ënnerbruecht ass, déi Méiglechkeet do huet. Dat féiert net zu Situatiounen, wéi Dir se hei schildert, datt do d'Aarbecht vun den Erzéier, vun deenen, déi se encadréieren, absolutt onméiglech wär, datt do permanent géif abuséiert gi vun esou engem Grondrecht. Absolutt net!

Ech wëll drun erënneren, datt an anere Strukturen, wou Jonker encadréiert ginn, déi net agespaart sinn, déi net dohinner placéiert sinn, déi all Dag fräiwëlleg dohiginn, och déi Jonk no enger gewëssener Prozedur d'Méiglechkeet hunn, bei Decisiounen - disziplinareschen Decisiounen an aneren - och kënnen nach ëmmer virun engem Riichter e Recours anzeleeën. Elo wëlte mer dat Recht grad deenen ewechhuelen, déi an eng Institution placéiert sinn, déi d'office manner Rechter hu wéi en aneren an do och nach agespaart sinn an an der Regel eigentlech sech selwer och nach vill méi schlecht kënnen verteidege wéi en anere Jonken oder wéi en Erwuessenen, deen och, egal wou en ass, ëmmer dat dote Recht an engem Rechtsstat soll hunn! Duerfir gi mer och net op deen dote Wee.

A mir liesen awer alleguerten déi internationaler Texter, zu deene sech och Lëtzebuerg verflucht huet, fir se anzehalen: Et ass d'UN-Konvention fir Kannerrechter vun 1989. Et sinn d'europäesch Norme fir Torturprävention an hirer leschter Versioun vun 2015. Et sinn d'europäesch Regele fir mannerjäreg Delinquantë vum Conseil de l'Europe vun 2008. Et sinn d'Regele vun Tokio, déi och minimal Regeln um Niveau vun den Nations Unies festhalen. Et sinn déi europäesch Regele fir de Strofvollzuch vum Conseil de l'Europe vun 2006. Et sinn d'Mandela-Regelen, déi och erëm eng Kéier fir d'Nations Unies minimal Regele fir den Traitement vun Detenuë fixéieren. Et sinn d'Lignes directrices fir eng adaptéiert Justiz fir Kanner vum Conseil de l'Europe vun 2010.

An all deenen doten Texter geet rieds dovunner, datt och e Jonken an där doter Situatioun e Recoursrecht muss hunn. Mir géifen déi doten Texter violéieren, wa mer deen Amendement do géifen unhuelen!

De Centre socio-éducatif de l'État huet eng Geschicht. An déi ass net nëmme glorriich. A wéi ech déi Responsabilitéit do iwwerholl hunn, hunn ech mer déi emol ugekuckt an ech hunn nogelies an deene sëllege Rapporte vum Comité contre la torture, dee regelméisseg eng Evaluatioun vum Centre socio-éducatif de l'État gemaach huet, wat alles do reprochéiert ginn ass.

Ech wëll lech soen, datt dës Regierung an déi Zäiten net wëllt zrëckgoen! Mir wëlle weider dru schaffen, datt mer déi doten Zäiten definitiv hanner eis loossen.

(Brouhaha)

Ech wëll haut och net doraus zitéieren. Duerfir maachen ech hei wierklech en Appell: Dat dote soll ee sech awer nach eng Kéier iwwerleeën, ob ee wierklech bei deene Jonken, déi am mannste sech selwer kënnen verteidegen, op esou en Urrecht vun engem Rechtsstat wëllt verzichten, wéi et hei gefuerdert ginn ass vun der Säit vun der CSV! D'Regierung kann op jidde Fall net mat op deen dote Wee goen.

Mir sinn der Meinung, datt...

(Interruption)

Jo?

► **M. Mars Di Bartolomeo**, *Président*.- Här Minister, erlaabt Der eng Präzisierung vun der Madamm Hetto?

► **M. Claude Meisch**, *Ministre de l'Éducation nationale, de l'Enfance et de la Jeunesse*.- Selbstverständlich!

► **Mme Françoise Hetto-Gaasch** (CSV).- Vu dass Der mech jo ugeschwat hutt, Här Minister, wëll ech dat wierklech hei ganz kloerstellen: Ech hunn a menger Ried ganz kloer gesot, dass mer am Fall vun der Sanction disciplinaire selbstverständlech der Meinung sinn, dass se sollen eng Recoursméiglechkeet hunn!

Mä dat, wat Dir hei am Gesetz virgesinn hutt als sougenannten „mesures disciplinaires“, wat am Fong geholl Saache sinn, déi een am Alldag quasi als Mesure-éducative géif benotzen, do fanne mer awer, dass een awer do net onbedéngt och muss e Recoursrecht hunn. An duerfir wollt mer déi Mesure-disciplinaires ersetzen duerch Mesures de bon ordre, wou een einfach hätt kënnen a senger Aarbecht soen: „Voilà! Dat an dat geet net!“ E Rappel à l'ordre,



en Avertissement an esou weider. An dee Moment hätt de Jugendlechen dorobber keng Recoursméiglechkeet gehat.

Selbstverständlech, bei der Sanction disciplinaire huet en eng Recoursméiglechkeet! Ech fäerte just, dass, wa mer déi heite Saachen, wat awer elo näischt extrem Schwéierfálleges ass, wat mer elo do gesprach hätten... Ech fannen net, (veuillez lire: Ech fannen net, dass eng Mesure disciplinaire auszeschwätzen bei man-ner grave Saachen,) dass mer domat iergendwellechen Texter widdersprach hätten, well ech mengen, déi Saachen, déi doranner stinn, déi bezieie sech op vill méi violent Saache wéi dat, wat hei an deenen heiten Texter drasteet.

► **M. Claude Meisch**, *Ministre de l'Éducation nationale, de l'Enfance et de la Jeunesse.*- Da schéng mer do eng aner Interpretatioun vun deenen Texter ze hunn. D'Regierung bleift op jidde Fall bei hirer Interpretatioun!

Et ass e puermol ugeklongen, ech hunn et am Ufank och gesot: Mir sinn der Meinung, datt mer hei e grouse Fortschrétt maachen, andeems mer eis d'Méiglechkeet ginn, déi tech-nesch an déi logistesche Méiglechkeet, fir Mi-neuren net méi mussen an enger Struktur mat Erwuessenen zesummen ze emprisonnéieren, an datt déi Situatioun, wéi se sech haut presen-téiert, alles anescht wéi glécklech ass.

Ech hunn och gesot, datt de Bëton Realitéite geschafen huet, déi ee muss unerkennen. Duerfir ass et awer elo gutt, datt déi Struktur hei endlech opgeet. Trotzdeem muss mer wei-derdenken, an deen een oder deen anere Vir-riedner huet dat jo och gemaach. D'Regierung denkt och, fir déi Aktivitéite vum Centre socio-éducatif de l'État ze dezentraliséieren, ze ku-cken, uechtert d'Land Strukturen ze kréien, virun allem méi kleng Gruppen ze kréien. Well 60 Jonker op engem Site zesummen ze enca-dréieren, Jonker, déi deen dote Passé hunn, déi déi Ursaache matbréngen, firwat datt se do sinn, datt ass sécherlech vill, vill méi schwierig a vill, vill méi komplex, wéi dat a vill méi iwwer-schaubare Strukturen ze maachen.

Mir denken och, datt mer mussen lwwer-gangsstrukturen hunn, fir datt deen, deen aus dem Centre socio-éducatif de l'État erauskënt, och eng Zäit laang nach ka begleet ginn an enca-dréiert ginn, sécherlech net méi esou héich-schwelleg encadréiert ginn, wéi dat noutwen-deg war, mä datt en awer nach encadréiert gëtt an eng Hëllefstellung kritt, bis e sech dann erëm definitiv eng Kéier an enger regulärer Si-tuatioun zurechtfindet.

An duerfir wäerte mer och, jo, ech denken och nach am Laf vun dëser Legislaturperiod éischt Mesurë kënnen op de Wee bréngen, wéi eng Dezentraliséierung an e Schaffen a Richtung vu méi klengen Unitéite méiglech ass an och ka geschafe ginn.

Ech wëll ofschléissend all den Intervenantë Merci soen, virun allem deenen natierlech, déi dësem Projet hir Zoustëmmung ginn.

Merci.

► **Une voix.**- Très bien!

► **M. Mars Di Bartolomeo**, *Président.*- Merci och. Mir sinn domat um Enn vun eisen Diskus-siounen ukomm a mir kënnen iwwert de Projet 6593 ofstëmmen.

Vote sur l'ensemble du projet de loi 6593 et dispense du second vote constitutionnel

An d'Ofstëmmung fänkt un. Fir d'Éischt déi perséinlech Stëmmen. D'Procuratiounen. An d'Ofstëmmung ass eriwuer.

De Projet ass mat 58 Jo-Stëmmen bei zwou Nee-Stëmmen ugeholl.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gasch, MM. Aly Kaes (par Mme Nancy Arendt), Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank,

Marc Spautz, Serge Wilmes, Claude Wiseler, Michel Wolter (par M. Claude Wiseler) et Laurent Zeimet;

MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol (par M. Franz Fayot), MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lamberty, Edy Mertens et Mme Lydie Polfer (par M. Gusty Graas);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini;

MM. Gast Gibéryen, Fernand Kartheiser et Roy Reding.

Ont voté non: MM. Marc Baum et David Wagner.

Ass d'Chamber bereet, d'Dispens vum zweete verfassungsméissege Vott ze froen?

(Assentiment)

Merci. Dann ass dat esou decidéiert.

6. Discours de M. le Président

Kolleginnen, Kollegen, mir sinn elo bal um Enn vun eiser Sëtzung ukomm. Et ass déi lescht Sëtzung virum Summer. Déi nächst éffentlech Sëtzung, wou déi aktuell Sessioun zougemaach an déi nei opgemaach gëtt, ass traditionell den zweeten Dënschden am Oktober. An dat fält dëst Joer op den 10. Oktober. Bis dohi ginn d'Aarbechten an de Kommissiounen, an der Verwaltung an an de Fraktiounen weider.

Dës Sessioun a virun allem déi lescht Woche wa-ren intensiv, souwuel wat déi national Aarbecht ugeet, wéi och déi international. D'Chamber hat dëst Joer e puer grouss international Rendez-vousen. Dee gréissten, dee mer jee haten, war sécher virun e puer Deeg déi 43. Sessioun vun der Assemblée parlementaire de la francophonie, APF, déi hire 50. Gebuertsdag zu Lëtzebuerg gefeiert huet, do, wou se 1967 geschaaft gouf.

Parallèl war och déi aacht Editioun vum Parle-ment francophone des jeunes, d'Treffe vun de Generalsekretäre vun de Parlamenten vun der Francophonie an eng Konferenz vun héijem Ni-veau vun den Unien aus der Francophonie.

Eis ganz Equipp huet exemplaresch Aarbecht geleescht bei där Organisatioun vun deem Mammutevent, wou iwwer 600 Leit vu véier verschiddene Kontinenter op Lëtzebuerg komm sinn, dorënner 25 Parlamentspresidenten.

All eis Leit, d'Deputéiert, d'Direktioun, eise Ser-vice international, verstärkt vu Fräiwëllegen aus dem Haus a Studenten, déi dës Konferenz zum Erfolleg gemaach hunn, hunn zu Recht vun eise Gäscht vill Luef kritt a verdéngen eis Unerkennung! Och dat war Nation Branding!

► **Plusieurs voix.**- Très bien!

► **M. Mars Di Bartolomeo**, *Président.*- Bravo och eise jonke Vertrieeder aus dem Jugendparla-ment! Esou just niewebäi gesot: Eng vun eise Vertrieederinnen aus dem Jugendparlament ass als dës beschit Riednerin vun deene Jonke be-stëmmt ginn. Och dat, mengen ech, ass eng gutt Reklamm fir eist Jugendparlament.

Um regionale Plang hu mer d'Presidentschaft vum parlamentaresche Rot vun der Grouss-regioun iwwerholl a stellen och hei de Bierger a seng Liewensqualitéit an de Vierdergrond.

Och um nationale Plang ass vill geschafft ginn. Et si wichteg Gesetzesprojete gestëmmt ginn, zum Beispill deen iwwert d'Nationalitéit, d'Re-form vum Congé parental, d'Steierreform, d'Gemengefinanzreform, dat sougenannt „Om-nibusgesetz“, d'Reform vun der Fleegeverséche-rung, d'Reformen am Enseignement, dorënner d'Lycéesreform, an d'Aféiere vun engem allge-menge Wäerteunterrecht an der Grondschoul,

Sommaire des séances publiques n^{os}47, 48 et 49

47^e séance

Ouverture de la séance publique p. 632

7014 - Projet de loi portant modification

1. du Code de la sécurité sociale;
 2. de la loi modifiée du 15 décembre 1993 déterminant le cadre du personnel des adminis-trations, des services et des juridictions de la sécurité sociale;
 3. de la loi modifiée du 25 mars 2015 fixant le régime des traitements et les conditions et modalités d'avancement des fonctionnaires de l'État p. 632-639
- 6944 - Débat d'orientation sur l'avenir de l'Union européenne et de la zone euro p. 639-654

48^e séance

Ouverture de la séance publique p. 655

7093 - Projet de loi sur l'exploration et l'utilisation des ressources de l'espace p. 655-661

6853 - Projet de loi ayant pour objet la mise en place d'un régime d'aide à l'investissement à finalité régionale p. 661-662

7112 - Projet de loi modifiant:

1. le Code du travail;
2. la loi modifiée du 9 novembre 1990 ayant pour objet la création d'un registre public ma-ritime luxembourgeois, en vue de transposer la directive (UE) 2015/1794 du Parlement eu-ro-péen et du Conseil du 6 octobre 2015 modifiant les directives 2008/94/CE, 2009/38/CE et 2002/14/CE du Parlement européen et du Conseil, et les directives 98/59/CE et 2001/23/CE du Conseil, en ce qui concerne les gens de mer p. 662-663

49^e séance

Ouverture de la séance publique p. 664

7149 - Projet de loi portant modification du Code du travail en vue de l'introduction d'un nouveau dispositif de lutte contre le chômage de longue durée p. 664-667

Ordre du jour p. 667

7033 - Projet de loi portant modification de la loi modifiée du 23 février 2001 concernant les syndicats de communes p. 667-668

6593 - Projet de loi portant modification

1. de la loi modifiée du 16 juin 2004 portant réorganisation du centre socio-éducatif de l'État;
 2. de la loi modifiée du 29 juin 2005 fixant les cadres du personnel des établissements d'en-seignement secondaire et secondaire technique;
 3. de la loi modifiée du 23 juillet 1952 concernant l'organisation militaire;
 4. de l'article 32 du Livre 1^{er} du Code de la sécurité sociale p. 668-672
- Discours de M. le Président p. 672

d'Ratifizéierung vum Klimapakt, déi gesetzlech Basis vum Space Mining an de Projet zur Bekämpfung vun der Laangzäitaarbeitslo-segkeet, fir nëmmen déi ze nennen. Et ass also vill an dësem Parlament geschafft ginn.

D'Parlament huet nieft senger normaler legisla-tiver Aarbecht eng ganz Rei Initiative geholl - Orientéierungsdebatten, Aktualitéitsdebatten - an e ganze Koup Debatten no Regierungser-klärungen gefouert, Aktualitéitsstonnen, an eng ganz Rei vu wichtige Motiounen gestëmmt, déi hei vum Parlament deponéiert goufen.

Et waren och eng ganz Rei vun Hearingen hei am Haus, sief et no enger Petitioun, wou mer an der Zwëschenzäit beim 21. Débat public ukomm sinn, wou also Theme vun de Leit hei an d'Chamber erabruucht gi sinn, déi net on-bedéngt hei debattéiert gi wären. Och ze erwä-nen ass déi Ausenanersetzung, déi ganz seriö Ausenanersetzung mat jonke Leit: Jugend-konferenz, Jugendparlament, Jugendkonvent an esou weider.

D'Chamber huet sech am leschte Joer weider no baussen opgemaach an et gouf vill un deem Informationsmaterial fir eng méi effi-zient politesch Bildung geschafft.

Léif Kolleginnen a Kollegen, ech soen lech al-leguer e grouse Merci fir déi gutt a kollegial Zesummenaarbecht. Ech wëll op dëser Plaz och dem ganze Personal vun der Chamber, mat un der Spëtzt dem Generalsekretär, mengem No-per, dem Claude Frieseisen, sengen zwee Ad-jointë Benoît Reiter an Isabelle Barra, de Mataar-bechter aus de Fraktiounen a politesche Sensibi-litéiten, der Press an dem Sécherheetspersonal ee ganz grouse Merci soen.

Ech hoffen, dass mer alleguer an och eis Leit dobaussen e puer gerousam an agreabel an erhuelsam Deeg wäerte kréien. Domat nach eng Kéier...

► **Une voix.**- Grausam?

► **M. Mars Di Bartolomeo**, *Président.*- Ge-rousam!

(Hilarité)

Also an anere Wieder: schéi Vakanz!

(Hilarité)

Merci. An domat géif ech mat engem ganz be-kannten Trainer soen: Et ass eriwuer!

(Fin de la séance publique à 16.35 heures)



Suivez la Chambre des Députés
sur Facebook, Twitter et
Instagram

